

Kōrero

Pānui

Tuhituhi

Pāngarau

Tau 1

Kua waihangatia Ngā Whanaketanga Rumaki Māori kia mōhio ai tātou kei whea tō tamaiti i roto i ngā mahi ako i Te Reo Matatini me te Pāngarau.

E hāngai pū ana ngā whanaketanga ki te Marautanga o Aotearoa, ko te whakaako i ngā wāhanga ako katoa, arā – Te Reo Māori, te Pāngarau, te Pūtaiao, ngā Tikanga ā-Iwi, te Hauora, Ngā Toi, Te Reo Ingarahi me te Hangarau.

Me mātua whakarato te kura o tō tamaiti i ētahi pūrongo ā-tuhi e rua i te iti rawa ki a koe i ia tau. Mā au pūrongo koe e whakamōhio e rere pēhea ana tō tamaiti i runga anō i Ngā Whanaketanga me te Marautanga. Mā te kura hoki tana kōpaki mahi e homai, heoi ki te kore, tonoa te kaiako kia whakaatu mai i ētahi tauira o ana mahi.

Mō te pukaiti nei, kua kapohia ngā momo akoranga a tō tamaiti i tana tau tuatahi i te kura – ā-kōrero, ā-pānui, ā-tuhituhi, ā-pāngarau anō hoki. He kaponga noa iho ēnei e kite ai koe e pēhea ana ōna mōhioanga, ōna āheinga hoki i roto i ēnei wāhanga ako.

Mēnā kua uru atu tō tamaiti i nā tata ake ki roto i te mātauranga rumaki ki te reo Māori, tērā pea ka paku rerekē te āhua e aromatawaihia ai – hei whakaata i tōna roa i roto i te mātauranga rumaki. Kōrero ki tō kaiako mēnā he āwangawanga ōu – māna e whakamārama ki a koe kei te pēhea te haere o āna mahi ako.



Kōrero

I te tau tuatahi i te kura, ko te reo kōrero o tō tamaiti kei te tīmatanga o te taumata 1 o te marautanga.

Ko te reo kōrero te pūtake o ngā reo katoa. I tēnei taumata, e taea ana e tō tamaiti te taki pepeha, te waiata, te mihi hoki – he reo hōhonu, he reo whānui, he reo matatini anō ēnei reo. E taea ana hoki e ia te taki i ana wheako whaiaro, te tohutohu atu me te whai tohutohu mai.

E ako ana tō tamaiti ki te:

- kōrero e pā ana ki ana kākahu, taonga, mea hoki
- maka pātai me te whakautu pātai māmā kia mārama ake ai ia, tētahi atu rānei
- tārua i tētahi paki māmā kua pānuitia ki a ia.

He tauira o ngā mahi kōrero, mahi whakarongo

- Ka whai i ngā tohutohu a te kaiako i roto i te akomanga – “Whakahokia ngā pukapuka ki te pae, ka noho takirua ai ki te whāriki.”
- E taki ana i te karakia o te ata.
- E taki ana i tōna ake pepeha.

I te kāinga

- Kia rere he tohutohu ki a ia – “Horoia ōu ringaringa.”, “Tīkina ōu hū.”, “Homai te pakipaki.”, “Taitaia ōu niho.”
- Pātai atu i aha ia i te kura – “I ako koe i te aha i tēnei rā?”, “He aha tāu mahi pai rawa atu i te kura i tēnei rā?”
- Tonoa ia kia āwhina i a koe ki te tunu kai – “Kia rua ngā kapu miraka.”, “Kia kotahi te pune huka.”, “Kōrorihia.”, “Tapatapahia.”



Pānui


I te tau tuatahi i te kura, ko te reo pānui o tō tamaiti kei te tīmatanga o te taumata 1 o te marautanga. E pānui ana ia i ngā pukapuka o te Kete Harakeke.

Ka mārama ia ki ngā pukapuka ka pānuitia e ia, me te kite anō i ngā kupu maha kei tana puna kupu. Kei te mōhio hoki ia he rite te pānui pukapuka ā-waha ki te kōrero.

E ako ana tō tamaiti ki te:

- pānui ā-rōpū me te tautoko atu, tautoko mai
- kimi māramatanga i ngā pikitia
- tautohu i ngā oropuare poto me ngā oropuare roa
- tautohu i ngā tikanga tuhi māmā – te irakati, te pū matua, ngā āputa i waenga kupu
- hono i ngā tuhinga ki ōna ake wheako
- tautohu i te ariā matua o te tuhinga.

Kua wehewehe ngā pukapuka ki roto 'Kete'. Tīmata ana ki te Kete Harakeke – he māmā, he poto te tuhinga. Ka piki ake ki te Kete Kiekie (i te tau tuarua i te kura), ka piki anō ki te Kete Pīngao, ā, ki te Kete Miro rā anō. Kei ia pikinga ka uaua ake, ka matatini ake te tuhinga.



Ko ētahi āhuatanga o te pukapuka Harakeke i tēnei reanga

- E tino hāngai ana ngā pikitia ki te tuhinga.
- He ngāwari te takotoranga o te kupu.
- He māmā te hanganga o te tuhinga.
- He nui te mahi tāruarua.
- He māmā ngā kupu.
- Kotahi te rerenga i ia whārangi, kotahi e rua rānei ngā rārangi.

Tērā pea i tō tamaiti e pānui ana i te paki, ka:

- whakapaetia e ia he aha te āhuatanga ka whai i muri ake i roto i te paki
- whakaaro ake ia ki ngā mahi e pai ana ki a ia
- whakamahia e ia ngā pikitia e mārama ai ia ki ngā kupu hou
- whakamahia e ia ngā rerenga o te tuhinga ki te kōrero mō ngā mahi e pai ana ki a ia.

I te kāinga

- He pārekareka ki tō tamaiti te whakarongo ki a koe e pānui pukapuka ana reo Māori mai, reo Ingarihi mai, reo aha mai rānei.
- Me haere tahi kōrua ki ngā whare pukapuka.
- Kīa kite tō tamaiti i a koe e pānui pukapuka ana – kia rongu tō tamaiti i a koe e kōrero ana mō te pai o ngā pukapuka kua pānuitia.
- Me kōrero kōrua e pā ana ki ngā pikitia i roto i ngā pukapuka.
- Kī a kōrua tahi te mahi pānui – māna i ētahi wā, māu i ētahi wā.


Tuhituhi

I te tau tuatahi i te kura, ko te reo tuhituhi o tō tamaiti kei te tīmatanga o te taumata 1 o te marautanga.

E taea ana e tō tamaiti te tuhi kia hāngai ana kōrero ki ngā pūtake maha, te pānui i ana tuhinga, me te kōrero e pā ana ki ēnei tuhinga.

E ako ana tō tamaiti ki te:

- whakamahere i tana tuhinga – mā te kōrero, te tā pikitia, te whakamahi kupu rānei
- whakamahi i ngā kupu kua mau kē i a ia i ana mahi pānui
- kōrero, tā pikitia rānei hei whakapuaki whakaaro
- tuhi kia hāngai ki tētahi pūtake, ki tētahi hunga pānui anō hoki
- tautohu i te tohutō hei tohu i te oropuare roa.



I tēnei tuhinga a te tamaiti nei, kua:

- tā pikitia ia hei āwhina ki te whakamahere i tana tuhinga
- whakamahia te irakati i te mutunga o te rerenga me te pū matua i te tīmatanga o te rerenga
- tuhi ia mai i te taha mauī ki te taha matau, me te waiho āputa ki waenga kupu.

I te kāinga

- He pārekareka te mahi tuhituhi! Whakaritea he pene whītau, he pene rākau, he pene hinu, he pepa hoki mā tō tamaiti.
- Tuhia e kōrua ngā tapanga rawe mō ngā wāhi me ngā taonga a tō tamaiti – tana kūaha, tana pouaka taputapu tākaro rānei.
- Tuhia he rerenga poto ki a ia, ka waiho ai ki roto i tana pouaka kai, ki raro rānei i tana pera.
- Āwhinatia ia ki te tuhi imēra, pātuhi, reta hoki ki ōna hoa, ki tōna whānau.






Pāngarau

I te tau tuatahi i te kura, ko te mahi pāngarau a tō tamaiti kei te tīmatanga o te taumata 1 o te marautanga. Ko te nuinga o ngā mahi pāngarau, he aro ki te ako tau.

Ka whakaoti rapanga tūturu ia i runga anō i tōna mārama ki te tau, te taurangi, te āhuahanga, te ine me te tauanga. Ka tatau atu ia i te tahi – mā ōna matimati, mā ētahi mea rānei, ki te whakaoti rapanga, ā, kua tīmata pea tana tatau ā-hinengaro. Kua tīmata ia ki te kite i ngā tauira tau pēnei i te $3+2=5$ me te $1+4=5$.

E ako ana tō tamaiti ki te:

- tatau whakamua, whakamuri hoki ki te 20, ā, i muri i tērā, ki te 100
- whakaoti rapanga pāngarau tae noa atu ki te 10, ā, i muri i tērā, ki te 20
- kite he aha te tau i mua, i muri rānei i tētahi atu tau kua tohua
- tūhura i te tauira, i te āhua me te ine
- whakarite me te toha i ētahi mea
- kōrero mō te wāhi – “kei whea ...”, “i whea ...”, “e haere ana ... ki whea”



He tauira rapanga tau

Anei he kaimoana. Whakatakotohia kia kitea mai e hia ngā momo kaimoana.

E hia ngā wheke?

Ko tēhea te kaimoana maha ake?

I te kāinga



He hira, he pārekareka hoki te pāngarau i roto i ngā mahi o ia rā.

Ngā tau me ngā tauira

- Kimihia ngā tau i ngā wāhi katoa – i te matawā, i te pouaka reta, i ngā tohu rori hoki. Me tatau whakamua, whakamuri hoki me ēnei mea.
- Tākarohia ngā panga, ngā kēmu kāri, ngā kēmu papa, ki ngā poro rākau hoki.

Ngā mahi o ia rā

- Kōrerohia te wā – rānui, wā kōrero pūrākau, wā moe.
- Kōrerohia ngā kupu pāngarau – raro, runga, waenganui, taumaha, māmā, porowhita, tapawhā, inanahi, āpōpō.
- Me tākaro ki te wai me ngā ipu rerekē, te kapu ine hoki.



Ngā mihi ki a rātou mā kua tautoko i te kaupapa nei.
Ngā mihi hoki ki te ākonga, nāna te tuhinga i te wāhanga Tuhituhi o tēnei pukaiti.

He kōrero anō mō Ngā Whanaketanga Rumaki Māori me Te Marautanga o Aotearoa kei te pae tukutuku o Te Tāhuhu o te Mātauranga, www.minedu.govt.nz.

Kaitā pikitia: Ellie May Logan.

Kaihoahoa: Spencer Levine.

Ko te pukapuka i te wāhanga Pānui, ko *Tinana Kori* nā Kararaina Pene i tuhi.

I whakaputaina tēnei pukaiti i te tau 2014 mō Te Tāhuhu o te Mātauranga e Hana Limited.

Mana pupuri © Te Tāhuhu o te Mātauranga, 2014.

Nama take: 710941

